

ները փչացրել են ձեզ: Եթե դուք լինեիք փոքր-ինչ զարգացած մարդ, ես ձեզ կապացուցանեի, որ դուք այդ գրքից ոչինչ չէք հասկացել: Բայց տգետների հետ խօսելը շատ դժոարին է: Ցաւալին այն է, որ ձեր սմանները քարոզիչներ եւ վարժապետներ են...

Նա վեր կացաւ եւ գնաց Ասլանի մօտ:

– Այդ մարդը խելագար է, – ասաց միսիոնարների առաջին աշակերտը նրա գնալուց յետոյ:

– Լո՛ւռ, անպիտան, – գոչեցի ես, – եթէ ոչ, ողջ տեղդ այդ յիմար գլուխդ կը թողնեմ:

Նա լռեց, միւսները նոյնպէս ոչինչ չխօսեցին:

Ես սկսեցի մի առանձին զգոնաք զգալ դեպի այդ մարդիկ, որոնք աւելի խղճալու կարօտ էին, քան թէ կարելի էր նրանց վրայ բարկանալ: Ողորմելի մարդիկ, մի գերութիւնից ընկել էին միւս գերութեան մէջ, թուրքի, քուրդի ստրկութիւնից դարձել էին միսիոնարի ստրուկ...

Ես գնացի Ասլանի մօտ, բայց Չալլադին այնտեղ չգտայ: Նա գնացել էր, երեւի, թափառելու գիշերային մթութեան մէջ, իր բորբոքած սիրտը զովացնելու համար: Ասլանը քնած չէր: Ես պատմեցի նրան Չալլադի վիճաբանութիւնը բողոքականների հետ: Նա խիստ սառնութեամբ պատասխանեց.

– Իզուր է այդպէս դատապարտել նրանց. այդ ողորմելիները ինչո՞վ են մեղաւոր, նրանք արդիւնք են մեր եկեղեցու անկարգութեան: Եթէ մենք ունենայինք օրինաւոր հոգեւորականութիւն, ի հարկէ, նրանք չէին լինի: Մեր ճանապարհորդութեան ժամանակ այնքան բազմաթիւ վանքեր տեսանք, այնքան բազմաթիւ վարդապետներ տեսանք: Ի՞նչ են շինում այդ տիմարները, ինչո՞վ են զբաղուած: Դու քո աչքով տեսար, դու այդ լաւ գիտես: Յայտնի բան է, նրանց վանքերի շուրջը կը կազմուի մի այդպիսի փչացած հասարակութիւն, որ ոչ ճշմարիտ բողոքական է եւ ոչ աւանդապահ լուսաւորչական:

Նա լռեց եւ մի քանի րոպէից յետոյ դարձեալ շարունակեց.

– Ոչինչ այնպէս, մանաւանդ արեւելքում, չէ կտրատում մի ազգի միութեան կապերը եւ չէ թուլացնում նրա ուժերը, որպէս կրօնական հերձոածն ու երկպառակութիւնը: Եւ մեր երկրին տիրող կառավարութիւնը շատ լաւ է հասկացել այդ: Իր քրիստոնեայ ժողովուրդներին մշտական կռոյի ու անհամաձայնութեան մէջ պահելու համար նա թոյլ է տալիս օտարազգի միսիոնարներին գործելու նրանց մէջ: Ֆրանսիան եզրիտներին, որպէս վնասակար տարր, արտաքսում է իր միջից, իսկ Թուրքիան այդ հրեշներին ասանջակութիւն է տալիս իր երկրում: Բողոքական քարոզիչները մեծ